
■ MUSICA

La BB Sursilvana a Domat e Falera

(abc) Venderdis e sonda presenta la Brass Band Sursilvana a Domat e Falera siu concert da primavera. Sut la direcziun dil dirigent *Urs Cadruvi* ha ella preparau in program divertent e cun parts solisticas. Ell'emprema part vegn igl auditori me-naus ellas aultas planiras dalla Scozia tiel toc «Hymn of the Highlands». Cun tuns fantastics descriva la cumposiziun en siat parts da *Philip Sparke* las cuntradas aspras e l'atmosfera climatica. La secunda part cuntegn ovras originalas da cumponists romontschs. «La sera sper il lag» da *Gion Balzer Casanova* e «Allas steilas» da *Tumasch Dolf*, ein arranschaments che *Thomas Rüedi* ha fatg per formaziun da brass. Era il marsch sinfonic da *John Golland* «Brass Band Graubünden» s'au-da tier las ovras ed ils temas ch'ein colli-giai ferm cun nossa regiun.

Cun *Roman Caprez* da Trin sepresen-ta in solist alla posauna ch'ei daventaus enconuschents sin plaun naziunal. Dapi plirs onns eis el solist tier la BB Bürger-musik Luzern, el ei era commember da differents orchesters. La BB Sursilvana ei ina formaziun che promova musicists giuvens e talentai buca mo dalla Sursel-va, mobein digl entir Grischun dil nord. Mintg'onn separticipescha ella alla con-currenza svizra da brass a Montreux. Igl onn 1993 ha la BB Sursilvana gudignau il tetel da campiun ella secunda classa.

Ils concerts dalla BB Sursilvana han liug ven-derdis, ils 27-5, ella halla plurivalenta a Domat e sonda, 28-5, ella Fermata a Falera, mintgamai allas 20.15.